

# La Cascharia Muraun ei puspei en funcziun

Igl emprem caschiel caura dalla Val Medel ei semtgau per la vendita

DA HANSHUONDER / ANR

- Dapi la fin october vegn puspei produciu caschiela Curaglia/Fadretschi. Il mument vegnan rodond 800 kg latg caura elavurai mintg'jamna. Igl unviern vargau ha la suprastanza dall'Uniu la caura decidiu da terminar la produziun ella Cascharia Muraun la fin da zercladur 2019 per motivs economics. Sco quei ch'ella ha giu communicau seigi ei buca stau sempel da prender quella decisiun, essend ch'ei eri reussiu da migliurar successivamein la qualitat dils products e da recaltgar in tschuppel clients. Ei seigi denton semussau ch'ils cuosts dil menaschi sappien per dabia buca vegnir cuvretgs cul model da menaschi. Igl ei lu denton reussiu beinspert d'anflar ina nova soluziun e sin fundament da quella ein ils responsabels perschuadi ch'il menaschi sa funcziunar.

## Cuntinuaziun dalla produziun

Per quest unviern, vul dir entochen la stad vegnenta, ein las localitads dalla Cascharia Muraun a Curaglia/Fadretschi affittai dall'indigena Madlaina Caviezel. Ella ei buc ina nunenconuscenta all'Uniu la caura. Curachel'uniun hade-

cidu igl onn 2014 da lantschar la produziun da caschiel eis ella stada l'emprema signuna. Treis unvierns ha ella procurau per caschiel caura ni era caschiel mischedau. Uss eis ella sedecidida da menar danovamein la cascharia e da garantir igl entir menaschi naven dil caschar entochen la vendita dil caschiel. «Il



Madlaina Caviezel duront la lavur ella Cascharia Muraun a Curaglia/Fadretschi. L'infrastructura cun indrezs da caschar e tschalers da caschiel ei integrada en dus gronds containers colligai in cun l'auter.

FOTO H. HUONDER

mument produceschel jeu duas ga per jamna mintgamai 400 kg latg caura. El decuors digl unviern duess jeu allura survegner empau dapli latg, aschia ch'ei vegn a dar treis caschadas», di la signuna. Sper caschiel caura e caschiel frestg da caura porscha ella era caschiel mischedau cun latg caura e vacca. Il mument vegn ella

furnida cun latg dil menaschi da Doris e Pieder Caviezel da Surcuolm. La fin october ha la produziun entschieted ussei igl emprem caschiel madirs e prompts per la vendita. Quels dis vegn la clientella orientada davart las cundiziuns. Tgei che succeda cul menaschi naven dalla stad vegnentaei aunc buca clar. «Quei depen-

da segiramein era co la vendita marscha il proxim miez onn», di Caviezel. Lu vegni ella a deciderschebein ella cuntinueschi.

## Signuna cun experientscha

L'affittadra dalla Cascharia Muraun, Madlaina Caviezel, ei bein enconuschen-

ta sco signuna en Surselva. Suenten haver absolviu la formaziun sco scolasta primara e la scola da puras ad Aschera eis ella buca mo stada engaschada en differents menaschis purils, mobein era sin pliras alps sco signuna. Aschia sill' Alp Puzetta en Val Medel, l'Alp da Rueun, a Sent e sill' Alp da Sevgein. Buca mo ina ga ha ella era acquistau arbagias cun siu caschiel d'alp. Dapi 2014 habitescha ella a Curaglia. La paletta da products ch'ella porscha quest unviern ella Cascharia Muraun pertucca en special in caschiel miez dir cun latg caura e latg caura mischedau cun latg vacca. Leutier vegn in caschiel frestg. Ils products san vegnir retratgs naven dad immediat per telefon 079 449 48 66 ni cascharia@lacaura.ch. Medemamein san els vegnir retratgs il proxim temps en pliras stizuns.

## Project in pass anavon

Parallelmein cun l'entschatta dil menaschi da caschar igl onn 2014 el vitg a Curaglia e dapi rodond quater onns a Fadretschi vegn fatg ponderaziuns da realisar ina nova cascharia en Val Medel. Quei project va pei a pei cun treis ulteriurs projects: Engrondaziun dalla Mazlaria Pally, in'organisaziun per la vendita dils products indigens ed il nez da bio-

gas per la produziun d'energia. Concernent il project dalla cascharia nova ei vegniu fatg uss in ulteriur pass. Las lavurs per l'etappa cun documentaziun fundamentala ein vegnidadas lantschadas il november. La finamira ei da saver producir en quella cascharia nova naven digl onn 2022.